

# मीका

## सोमरोन अउ इस्त्राएल क सजा दीन्ह जाइ

1 यहोवा क सँदेस मीका लगे राजा योताम, आहाज अउ हिजकिय्याह क समइ मँ आवा। इ सबइ पुरुस यहूदा क राजा रहेन। मीका मोरेसेती स रहा। मीका सोमरोन अउर यरूसलेम क बारे मँ इ सबइ दर्सन देखेन।

2हे लोगो, तू पचे सबहिँ सुन ल्या! हे धरती अउर जउन कछू धरती पइ अहइ, सुना। मोर सुआमी यहोवा इ पवित्तर मन्दिर स आइ। मोर सुआमी तोहरे विरोध मँ एक साच्छी क रूप मँ आइ।

3लखा, यहोवा आपन जगह स बाहेर जात अहइ। उ धरती क ऊँच जगहियन पइ चलइ बरे उतरिके तरखाले आवत अहइ।

4परमेस्सर यहोवा क गोड़े क नीचे पहाड़ टेघर जइहीं, घाटियन चरमराइ जइहीं। जइसे आगी क समन्वा मोम टेघर जात ह, जइसे ढालू जगह स पानी उतरत भवा बहत ह।

5अइसा काहे होई? इ एह बरे होई कि याकूब अपराध किहेस ह। काहेकि इस्त्राएल क लोग पाप किहेस ह।

## सोमरोन, पापे क कारण

कउन याकूब स पाप कराए रहेन? इ सोमरोन अहइ! यहूदा मँ कउन ऊँच ठउरन अहइ? उ सबइ यरूसलेम मँ अहइ।

6एह बरे मईँ सोमरोन क खाली मइदान अउर खंडहरन क ढेर बनाउब। इ अइसी जगह क नाई होइ जब जेहमौँ अंगूर क बाग लगावा जात हीँ। मईँ सोमरोन क पाथरन क घाटी मँ फेंकि देब। मईँ ओकरी सबहिँ नेंव क प्रदीसित कइ देब।

7ओकर सबइ मूरतियन टूकन मँ तोरि दीन्ह जइहीं। सारा धन जेका इ रण्डीबाज़ी दुआर कमाएस ह, आगी स भसम होइ अउर मईँ एकर लबार देवतन क मूरतियन क नस्ट कइ देब। काहेकि उ सबइ लाभ रण्डीबाज़ी दुआरा हासिल किहेन ह, अउर ठीक वइसा ही रण्डी क मजूरी मँ खर्च कीन्ह जाब।

## मीका क महान दुःख

8मईँ इ हाली आवइवाला बिनास क कारण बियाकूल होबउँ अउर हाय-हाय करिहउँ। मईँ पनही न पहिरब अउर न ओढ़ना धारण करब। सियारन क जइसे मईँ जोर स चिल्लाब। मईँ विलाप करब जइसे सुतुर्मर्ग करत हीँ।

9सोमरोन क घाव नाहीं भर सकत ह। ओकर बियाधि यहूदा तलक फइलि गवा अहइ। इ मोर लोगन्क नगर-दुआर तलक पहाँच गवा बल्कि इ तउ यरूसलेम तलक आइ गवा ह।

10एकर बात गात क नगरी मँ जिन करा। अको मँ जिन रोआ। विलाप करा अउर बेत-आप्रा क माटी मँ लोटा।

11हे सापीर क निवासिन, तू अपने राहे नंगी अउर लज्जा होइके चली जा। उ सबइ लोग, जउन सानान क बसइया अहईँ, बाहेर नाहीं निकरिहीं। बेतेसेल क लोग रोवत बिलखिहीं अउर तू पचन्स सहारा लेइहीं।

12अइसा उ मनईँ जउन मारोत क बसइया अहइ, सुसमाचार आवइ क बाट जोहत भवा दुर्बल होत जात अहइ। काहेकि यहोवा स तरखाले यरूसलेम क मगर-दुआर पइ विपद उतरि अहइ।

13हे लाकीस क बसइयो, तेज घोड़न क रथन मँ जोरा। सिय्योन क पाप लाकीस मँ सुरू भए रहेन। काहेकि तू इस्त्राएल क पापन्क पाछे चलति अहा।

14तउ तोहका गात मँ मोरेसेत क बिदाई क उपहार देइ क अहइ। अकजीब क घराना इस्त्राएल क राजा लोगन क निरास करिहीं।

15हे मारेसा क बसइयो, तू पचन्क विरोध मँ मईँ एक तु मनईँ क लिआउब जउन तू पचन्क सबइ चिजियन्क छोरि लेइ। इस्त्राएल क महिमा अदुल्लाम मँ आइ।

16एह बरे तू पचे आपन बार कटवाइ ल्या अउर तू गंजा बनि जा। काहेकि तू पचे आपन गदेलन बरे जेनसे तू पचे पियार करत रह्या रोउब्या चिल्लउब्या। आपन मुडैँन क गिद्ध क नाई गंजा होइ द्या। काहेकि उ पचे तू पचन्क छोड़ि देइ अउर बाहेर निकरि जाइ बरे मजबूर होइ जइहीं।

## लोगन्क बुरी योजन

2 ओन लोगन क बुरा होइ, जउन पाप स भरी योजना क बनावत हीँ। अइसे लोग बिछउना मँ सोवत भए सइयंत्र रचत हीँ अउर पौ फाटत ही आपन सइयंत्रन पइ चलइ लागत हीँ। काहेकि ओनके लगे ओनका पूरा करइ क सक्ती अहइ।

2ओनका खेत चाही तउ उ पचे ओन सबन्क लइ लेत हीँ। ओनका घर चाही तउ उ पचे ओन सबन्क लइ लेत हीँ। उ पचे कउनो मनईँ क छलत हीँ अउ ओकर घर छोरि लेत हीँ। उ पचे कउनो मनईँ क छलत हीँ अउ ओसे ओकर चिजियन छोरि लेत हीँ।

## लोगन्क सजा देइ क यहोवा क योजन

3इहइ कारण अहइ कि यहोवा इ बातन क कहत ह: “देखा, मईँ इ परिवारे पइ बिपदन ढावइ क योजना रचत हउँ। तू पचे आपन सुरच्छा नाहीं कइ पउब्या। तू पचे घमण्ड स चलि छोड़ देब्या। काहेकि उ एक बुरा समइ होइ।

4उहड़ समइ लोग तू पचन्क हँसी उड़इही। तू तोहार बारे में लोग करुणा क गीत गइहीं अउर उ पचे कइहीं: 'हम पचे बर्बाद होइ गए। यहोवा मोरे लोगन्क धरती छोरि लिहस ह अउर ओका दूसर लोगन्क दइ दिहस ह। हँ उ मोर धरती क मोसे छोरि लिहस ह। यहोवा हमार धरती हमरे दुस्मन क बीच बाँटि दिहस ह।'

5'यहोवा क परिसद मैं कउनो मनई अइसा नाही होइ जउन भुइँया क बाँटइ बरे पासा फेंकिहीं।

### मीका क उपदेस देइ क मना करब

6लोग कहा करत ही, "तू हम पचन्क उपदेस जिन द्या। ओनका अइसे नहीं कहइ चाही, हम पइ कउनो भी बात बुरी नहीं परी। 7याकूब क लोगो, का तू आपन-आप स कहत अहइ, 'का यहोवा हमार संग आपन सब्र खो रहा अहइ? अगर उ सही मैं अइसा करत ही?' किन्तु मोर सब्द उ लोगन बरे नीक होइ जउन उचित तरीका स जितत ह। का उ नाही अहइ?"

### परमेस्सर क लोग परमेस्सर क दुस्मन होइ गएन

8मुला अबहीं अबहीं, मोर ही लोग मोर दुस्मन होइ गवा अहइँ। तू पचे राहगीरन क ओढ़ना उतारत अहा। जउन लोग सोचत हीं कि उ पचे सुरच्छित अहइँ, मुला तू पचे ओनसे ही चिजियन क छोरि लेत ह जइसे उ पचे जुद्ध बंदी होइँ।

9मोरे मनइयन क मेहररूनन क तू पचे ओनके घरन स निकरि जाइके मजबूर किहा जउन घर सुन्नर अउ आरामदेह रहेन। तू पचे मोरी महिमा क ओनके नान्ह नान्ह गदेलन स हमेसा-हमेसा बरे छोरि लिहा ह।

10उठा अउर हिआँ स भागा। इ आराम क जगह नाही अहइ। काहेकि इ ठउर असुद्ध होइ ग अहइ, इ बर्बाद होइ जाइ। इ खउफनाक विनास होइ।

11अगर कउनो लबार नबी आवइ अउर उ लबार बोलइ, "तउ मइँ तोहका दाखरस अउर मदिरा क बारे मैं उपदेस देब" तउ उ तरह उ ओकर नबी बन जाइ।"

### यहोवा अपने लोगन्क बटोरी

12हे याकूब क लोगो, मइँ तू सबन्क बटोरब। मइँ निहिचइ ही तू सबन क एक जगह बटोरब। मइँ इस्राएल क बचे भए लोगन क बटोरब। मइँ ओनका वइसा बटोरब जइसे बाड़ा मैं भेड़िन बटोरी जात हीं। तउ उ पचे एक बड़ा भीड़ स जियादा हल्ला-गुल्ला करिहीं।

13तब कउनो एक जउन रास्ता खोलत ह लोगन क समन्वा जाइ। उ दुआरन तोड़ब अउर इ सबइ लोगन क नेतृत्व करब। उ सबइ लोग अजाद होइके उ सहर क तजिके निकरिहीं। ओनके समन्वा ओनकर राजा चली। लोगन्क समन्वा ओनकर यहोवा होइ।

### इस्राएल क मुखिया बुगई क अपराधी अहइँ

3 फुन मइँ कहेउँ, "हे याकूब क मुखिया लोगो, अब सुन ल्या। हे इस्राएल क प्रजा क सासक लोगो, अब सुन ल्या। तू पचन्क जानइ चाही कि निआव का होत ह।

2किन्तु तू पचन्क नेकी स घिना अहइ अउर तू पचे लोगन्क खाल तलक उतारि लेत अहा। तू पचे लोगन्क हाइन स मौँस नोच लइ लेत अहा।

3तू पचे मोरे लोगन्क बर्बाद करत अहा। तू पचे ओनकर खाल तलक ओनसे उतारत अहा अउर ओनकर हाइ तलक तोड़त अहा। तू पचे ओनकर हाइन अइसे तोड़त अहा जइसे हँड़ी मैं मौँस चढ़ावइ बरे।

4तू पचे यहोवा स बिनती करब्या मुला उ तू पचन्क जवाब नाही देइ। नाही, यहोवा आपन मुँहना तू पचन्स छुपाइ। काहेकि तू पचे बुरा करम किहे अहा।"

### लबार नबी

5इ उ अहइ जेका यहोवा लबार नबियन क बारे मैं बतावत ह जउन ओकर लोगन क गलत तरीका स निर्देसित करत ह: "अगर लोग एँ नबियन क खाइ क देत हीं, उ पचे ओकरे बरे सान्ति क कामना करी। मुला अगर लोग ओनका खाइके नाही देतेन, तउ उ पचे ओकरे बरे जुद्ध क कामना करी।

6एह बरे इ तू पचन बरे राति सा होइ। तू पचे कउनो दर्सन नाही लख पउब्या। तउ तू पचे इ अचरज कारज नाही करइ पाउब्या। एह बरे इ तू पचन्क अँधियारा जइसा लागी। नबियन पइ सूरज छुप जाइ अउर ओनके ऊपर दिन करिया पड़ि जाइ। 7भविस्स क द्रस्टा लजाइ जइहीं। उ सबइ लोग, जउन भविस्स लखत हीं, ओनकर मुँहना करिया होइ जइहीं। हँ, उ सबइ सबहिं आपन मुँहना बंद कइ लेइहीं काहेकि हुआँ परमेस्सर कइँती स कउनो जवाब नाही होइ।"

### मीका परमेस्सर क सच्चा नबी अहइ

8मुला यहोवा क आतिमा मोका सकती, नेकी अउर सामरथ स भरि दिहस रहा। मइँ याकूब क ओकर अपराधन क बताउब। मइँ इस्राएल क ओकरे पापन क बारे मैं कहब।

### इस्राएल क मुखिया दोखी अहइँ

9हे याकूब क मुखिया लोगो, इस्राएल क सासक लोगो, तू पचे मोर बात सुना! तू पचे निआव स घिना करत अहा। जउन चीज सोझ होइ तू पचे ओका टेड़ी कइ देत अहा।

10तू पचे सिथ्योन क निर्माण लोगन क हत्तिया कइके किहा; तू पचे यरूसलेम क भयंकर अपराधन क जरिये बनाए रह्या।

11यरूसलेम क निआवधीस झूठे फैसले देइ बरे घूस लेत रहेन। यरूसलेम क याजकन क धन देइ पड़त ह, एँकरे पहिले कि उ पचे लोगन्क सीख देई। लोगन्क नबी लोगन्क धन देइ पड़त ह। एँकरे पहिले कि उ पचे भविस्स मैं झाँकइ अउर फुन भी उ सबइ मुखिया सोचत हीं कि ओन पइ कउनो दण्ड नाही पड़ सकत। उ सबइ सोचा करत हीं, यहोवा ओनका बचाइ लेइ अउर उ पचे कहत हीं, "यहोवा हमरे बीच मैं रहत ह। एह बरे हमरे संग कउनो बुरी बात नाही घटि सकत ह।"

12हे मुखिया लोगो, तू पचन्क कारण सिथ्योन क बिनास होइ। इ कउनो जोते भए खेत क तरह सपाट होइ जाइ।

यरूसलेम पाथरन क टीला बन जाइ अउर मन्दिर क पहाड़ झाड़ियन स ढका भवा एक ठु सूनी पहाड़ी होइ।

### विवस्था यरूसलेम स आइ

**4** अगवा आवइवाली समइ इ घटना घटी। यहोवा क मन्दिर क पहाड़ सबहि पहाड़न में बहोत ही महत्व स भरा भवा होइ जाइ। ओका पहाड़न क ऊपर उठाइ दीन्ह जाइ। दूसर देसन क लोग ऐंकी कइँती उमड़ि पड़िहीं।

2अनेक दूसर रास्ट्र आइहीं अउर कइहीं, “आवा! यहोवा क पहाड़े पड़ ऊपर चलइँ। याकूब क परमेस्सर क मन्दिर चलइँ। परमेस्सर हम पचन्क आपन राह सिखाइ। तउ हम पचे ओकरे पथ पड़ चलबा।” काहेकि परमेस्सर क नेमन सिथ्योन स आइ अउर यहोवा क बचन यरूसलेम स आइ।”

3परमेस्सर बहोत स जातियन क निआव करी। परमेस्सर ओन ससक्त देसन क फइसला करी, जउन बहोत-बहोत दूर अहइँ अउर फुन उ सबइ आपन तरवारन गलाइके अउर ओनका पीटिके हरे क फार में बदल देइहीं। उ सबइ देस आपन भालन क पीटि पीटिके अइसे औजारन में बदलि देइहीं, जेनसे बृच्छन क काट छोट होत रहत ह। देस तरवारन क उठाइके आपुस में नाहीं लड़िहीं। अब उ सबइ जुद्ध क सबइ विद्या अउर जियाद नाहीं सीखिहीं।

4मुला हर कउनो आपन अंगूरे क बेलन क तरखाले अउर अंजीर क पेड़ क नीचे बइठा करी। कउनो भी मनई ओनका डेराइ नाहीं पाइ। काहे? काहेकि सर्वसक्तीमान यहोवा इ कहेस ह।

5दूसर देसन क सबहि लोग आपन देवतन क अनुसरण करत हीं। मुला हम पचे आपन परमेस्सर यहोवा क सदा-सर्वदा अनुसरण करत हीं।

### उ राज जेका वापिस लिआउब अहइ

6यहोवा कहत ह, “उ समइ में मई जउन लँगड़ा होइ गवा ह एक संग बटोरब। मई ओन लोगन क बटोरब जउन भेजा ग अहइ अउर ओन लोगन क जेकरे संग मई बुरा काम किहे रहउँ ह।

7उ “ध्वस्त नगरी” क लोग बचा भवा लोग होइहीं। उ सहर क लोगन क तजिके भाग जाइके मजबूर कीन्ह गवा रहा। मुला मई ओनका एक ठु सुदृढ़ जाति क रूप में बनाउब।” यहोवा ओनकर राजा होइ अउर उ सिथ्योन क पहाड़े पड़ स सदा सासन करी।

8हे रेवड़ क पहरा क मीनार, हे ओपेल, सिथ्योन क पहाड़ी, तू फुन स सरकार क जगह पड़ बइठब्या। हे बिटिया यरूसलेम,\* उ राज्ज तोहमाँ ही रहब जइसा अतीत में रहा।”

### इस्त्राएलियन क बाबुल क लगे काहे जाइ चाही?

9अब तू पचे काहे ऐंती ऊँच आवाज में गोहरावत अहा? का तोहोर सबन क राजा जात रहा बाटइ? का तू पचे आपन

**बिटिया यरूसलेम** यरूसलेम नगर क सीर्सक। हिब्रु सब्द क अरथ अहइ ‘बिटिया’ अउर ‘उपनगरी’। यरूसलेम क पर्वत क बिटिया क रूप में दिखाया गवा ह जउन बना गवा अहइ।

मुखिया खोइ दिहा ह? तू पचे अइसे तड़पत अहा जइसे कउनो मेहरारू बच्चा पड़दा करइ क समइ में तड़पत ह।

10सिथ्योन क बिटिया, तू पीरा क झेला। तू उ मेहरारू जइसा होइ जा जउन बच्चा पड़दा करइ क समइ में फड़फड़त ह। काहेकि अब तोहका नगर (यरूसलेम) क तजइ क बाटइ। तोहका खुले मइदान में रहइ क बाटइ। तोहका बाबुल जाइ क होइ किन्तु उ जगह स तोहार रच्छा होइ जाइ। यहोवा हुँआ आइ अउर उ तोहका तोहरे दुस्मनन स वापिस लइ आइ।

### दूसर जातियन क यहोवा बर्बद करी

11तोहसे लड़इ बरे अनेक जाति अइहीं। उ पचे कहत हीं, “सिथ्योन क लखा। ओह पड़ हमला करा!”

12लोगन्क ओनकर आपन योजनन अहइँ, मुला ओनका अइसी ओन बातन क पता नाहीं जेनके बारे में यहोवा योजना बनावत अहइ। यहोवा ओन लोगन्क कउनो खास प्रयोजन बरे हिआँ लिआवा। उ सबइ लोग वइसे कुचुर दीन्ह जइहीं जइसे खरिहाने में अनाज क पूरी कुचरी जात हीं।

### इस्त्राएल आपन दुस्मनन क पराजित कइके विजयी होइ

13“हे सिथ्योन क बिटिया, खड़ी होइ जा अउर तू ओन क कुचरि द्या। मई तोहका सक्तीसाली बनाउब। तू अइसी होउबिउ जइसे तोहरे सींग लोहा क अउर तोहरे खुर कौंसा क होइँ। तू बहोत स जातियन क नस्ट करब्या। तू ओनके धने क यहोवा क अर्पित करा। तू ओनकर खजानन क समूची धरती क सुआमी क समर्पित करब्या।”

**5** हे सुदृढ़ सहर, अब तू आपन फउजियन क बटोरा। दुस्मन हमला करइ क हम पचन्क घेरत अहइँ। उ पचे इस्त्राएल क जज क मुँहना पड़ आपन सौटा स प्रहार करिहीं।

### बेतलेहेम में मसीह जन्म लेइ

2हे बेतलेहेम एप्राता, तू यहूदा क छोटा सहर अहा अउर तोहार परिवार गनती में बहोत कम अहइ। किन्तु “इस्त्राएल क सासक” मोर बरे तोहसे आइ। बहोत पहिले सुदूर पुराने जमाने में ओकरे घराने क जड़न बहोत पहिले स होइहीं।

3यहोवा आपन लोगन्क ओनकर दुस्मनन क हाथे में सौंपि देइ। उ पचे उ समइ तलक हुअँइ पड़ बना रइहीं जब तलक उ मेहरारू आपन लरिका क नाहीं जन्म देत। फुन ओकरे बचा भवा भाईयन इस्त्राएल क लोगन्क लगे लउटिके अइहीं।

4तब इस्त्राएल क सासक खड़ा होइ अउर भेड़िन क झुंड क चराइ। यहोवा क सक्ती स उ ओनका राह देखँइ। उ यहोवा आपन परमेस्सर क अजूबा नाउँ क सक्ती स ओनका राह देखँइ। हुआँ सान्ति होइ, काहेकि उ समइ में ओकर महानता धरती क छोरन तलक पहोंच जाइ।

5हुआँ सान्ति होइ, अउर अस्सूर क सेना हमार बिसाल भवन तोड़ी, तउ इस्त्राएल क सासक सात ठु गड़रियन चुनी। नाहीं, हम पचे आठ मुखिया लोगन्क पाउब।

6उ पचे अस्सूर क लोगन पड़ आपन तरवारन स हुकूमत करिहीं। ओनका राज्ज तरवारन क सक्ती स नम्रोद क धरती

पइ सासन करिहीं। फुन इस्त्राएल क सासक हम पचन्क अस्सूर क उ सबइ लोगन्स बचाइ जउन हमरी धरती पइ अइहीं अउर उ पचे हमरी चउहद्दी क आपन पैड़ तले रौदिहीं।

7फुन बहोत स रास्ट्रन क बीच में याकूब क बची भइ सन्तान ओस क बूँदन जइसी होइहीं जउन यहोवा कईती स आइ होई। उ पचे घासे क बरखा जइसी होइहीं। उ पचे लोगन पइ आसरा नहीं रखिहीं। उ पचे कउनो मनई क इंतजार नहीं करिहीं।

8बहोत स लोगन क बीच याकूब क बचे भए लोग उ सेर जइसे होइहीं जउन जंगल क पसुअन क बीच होत ह। जब सेर बीच स गुजरत ह तउ उ हुवई जात ह, जहाँ उ जाइ चाहत ह। उ पसू पइ टूटि पड़त ह अउर उ पसू क कउनो बचाइ नहीं सकत ह। ओकर बचे भए लोग अइसे ही होइहीं।

9मई तू पचन क हाथ तोहारे दुस्मनन क खिलाफ उठउब अउर तू पचे ओनकर बिनास कइ डउब्या।

### लोग परमेस्सर क भरोसे पइ रइहीं

10यहोवा कहत ह: “उ समइ मई तू पचन्स तोहार सबन्क घोड़ा छोरि लेबउँ। तोहार सबन्क रथन क बर्बाद कइ देबउँ।

11तोहार सबन्क नगरन उजारि देबउँ। मई तोहार सबन्क सबहिं गढ़न क ढहाइ देबउँ।

12मई तोहार जादूगसन क नस्ट कइ देब। अउर तोहार लगे अइसा एक भी मनई नहीं होब्या जउन भविस्सवक्ता होइ।

13मई तोहार पचन्क लबार देवतन क मूर्तियन क बर्बाद करब। ओन लबार देवन क पाथसन क स्मृति-स्तंभ मई उखारिके लोकाँउबउ जेनका तू पचे आपन हाथन स बनाया ह। तू पचे ओनकर पूजा नहीं कइ पउब्या।

14मई असेरा क पूजा क खम्भन क नस्ट कइ देबउँ। मई तू पचन्क नगरन क तहस-नहस कइ देबउँ।

15मई आपन बदला किरोध स लेबउँ अउर ओह पइ तीव्र होबउँ जउन मोर नहीं सुनिहीं।”

### यहोवा परमेस्सर क सिकाइत

6 जउन यहोवा कहत ह ओह पइ तू पचे कान द्या। तू पचे पहाड़न क समन्वा खड़ा होइ जा अउर आपन मुकद्दमा क पैस करा। पहाड़न क तोहार सिकायत सुनइ द्या।

2यहोवा क आपन लोगन स सिकाइत अहइ। पहाड़ो, तू सबइ यहोवा क सिकाइत क सुना। धरती क नेंव, यहोवा क सिकाइत क सुना। उ साबित करी कि इस्त्राएल दोखी अहइ।

3यहोवा कहत ह: “हे मेरे लोगो, का मई कबहुँ तोहार सबन्क कउनो बुरा कियेउँ ह? मई कइसे तोहार सबन्क जिन्गगी कठिन कियेउँ ह? मोका बतावा, मई तोहारे सबन्क संग का कियेउँ ह?

4मई तू पचन्क बतावत हउँ जउन मई तोहारे सबन्क संग कियेउँ ह, मई तू पचन्क मिस्त्र क धरती स निकारि लियाएउँ, मई तू सबन्क गुलामी स मुक्ति दियाएउँ रहे। मई तू पचन्क निअरे मूसा, हारून अउ मरियम क पठए रहेउँ।

5हे मोर लोगो, मोआब क राजा बालाक क बुरा जोजना क सुमिरा। उ सबइ बातन क सुमिरा जउन बोर क पूत बिलाम बालाक स कहे रहेन। उ सबइ बातन क सुमिरा जउन सित्तीम स गिल्गाल तलक घटी रहिन। तबहिं समुझ पउब्या कि यहोवा उचित अहइ।”

### परमेस्सर हम पचन्स का चाहत अहइ?

6जब मई यहोवा क समन्वा जाबउँ अउर परणाम करँउ, तउ परमेस्सर क समन्वा आपन संग का लइके जाबउँ? का यहोवा क समन्वा एक बरिस क बछवा क होमबलि लइके जाबउँ?

7का यहोवा एक हजार भेड़न स या दस हजार तेल क नदियन स खुस होइ? का आपन पापे क बदले मँ मोका आपन पहली संतान क अर्पित करइ चाही? का मोका पइदा होआ बच्चा आपन पापन क बदले मँ दे देइ चाही?

8हे मनई, यहोवा तू पचन्क उ बातन बताएन ह जउन उत्तिम अहइ। इ सबइ उ सबइ बातन अहइ, जेनकर यहोवा क तू सबन्स अपेच्छा अहइ: उ सब करा जउन दूसर लोगन बरे नीक रहा। दयालु रहा, अउर आपन जिन्गगी परमेस्सर क संग विनम्रता स आगे बढ़ावा।

### इस्त्राएल क लोग का करत रहेन?

9यहोवा क वाणी यरूसलेम क गोहरावत अहइ। बुद्धिमान मनई यहोवा क नाउँ क मान देत हीं। सजा क डण्डा पइ धियान द्या। ओह पइ धियान द्या जउन भाग्य अहइ!

10का अबहुँ भी दुट्ट आपन चोरोंए खाजाना क छुपावत अहइ? का उ पचे अबहुँ भी तउल मँ ओन खोटा टोकरियन\* क प्रयोग करत ही, जेसे यहोवा घिना करत ही?

11का मई ओन दुट्ट लोगन क दोस मुक्त कइ देबउँ जउन अबहुँ भी गलत बॉटन अउर खोट तराजू लोगन क ठग लेइ क कामे मँ लियावत हीं? का मई ओन दुट्ट लोगन क दोस मुक्त कइ देबउँ, जउन अबहुँ भी अइसी गलत तउल क इस्तेमाल करत हीं?

12उ सहर क धनी मनई अबहुँ भी क्रूर करम करत ही। उ सहर क बसइया अबहुँ भी झूठ बोला करत हीं। हौं, उ पचे लोग मनगढ़ंत झूठ क बोला करत हीं।

13तउ मई तू पचन्क सजा देब सुरू कइ दिहेउँ ह। मई तू पचन्क तोहार पचन्क पापन बरे बर्बाद कइ देबउँ।

14तू पचे खइया क खाब्या मुला तोहार पेट नहीं भरी। तू पचे फुन भी भूखा रहब्या। तू लोगन्क सुरच्छित जगह पइ लियावइ बरे जतन करब्या किन्तु मई ओनका तोहारे दुस्मनन क तरवारे क देब।

15तू पचे आपन बिया बोउब्या किन्तु तू पचे ओका नहीं काटब्या। तू पचे घानी मँ पेरिके आपन जइतून क तेल निचोरब्या, मुला तू पचन्क उ तेल क इस्तेमाल नहीं करिहीं। तू पचे आपन अंगूरन क खूँदिके निचोरब्या मुला तू दाखरस नहीं पिअइहीं।

**खोटा टोकरियन** बाट टोकरियन जउन कि असल मँ छोटा रहेन ताकि ओन लोगन क धोखा दीन्ह जाइ सकी जउन उ समान खरदत ह जउन कि वजन या मात्रा क अनुसार बेचा जात अहइ।

16अइसा काहे होइ? काहेकि तू पचे ओग्री क नेमन पर चलत अहा। तू पचे ओन बुरी बातन क करत अहा जेनका आहाब क परिवार करत रहा। तू पचे ओनकर सिच्छन पइ चलत रहत अहा एँह बरे मई तू पचन्क नस्ट भ्रस्ट कइ देबउँ। तू पचन्क सहरे क लोग क हँसी होइ। तू पचन्क दूसर रज्जन क घिना झेलइ क पड़ी।

### लोगनक पाप आचरण पइ मीका क बियाकुल होब

7 मई बियाकुल अहई। काहेकि मई गरमी क उ फले जइसा अहउँ जेका अबहुँ तलक बिन लीन्ह ग अहइ। मई ओन अंगून जइसा अहउँ जेनका तोरि लीन्ह ग अहइ। अब हुआँ कउनो अंगूर खाइ क नाहीं बचा अहइ। सुरूआती क अंजीर जउन मोका भावत हीं, एक भी नाहीं बची अहई।

2एकर इ अरथ अहइ सबहिं सच्चे लोग जात रहत अहई। कउनो भी सज्जन मनई इ पहँटा में नाहीं बचा अहइ। हर मनई कउनो दूसर क मारइ क घात में रहत ह। हर मनई आपन ही भाई क फँदा में फँसावइ क जतन करत बाटइ।

3लोग दुइनउ हाथन स बुरा करइ में होसियार अहई। अधिकारी लोग रिसवत मँगत हीं। निआव क जज अदालतन में फइसला बदलइ बरे घूस लेत रहत हीं। “महत्वपूर्ण मुखिया” खरा अउ निस्पच्छ निर्णय नाहीं लेतेन। ओनका जइसा भावत ह उ पचे वइसा ही काम करत हीं।

4हिआँ तलक कि ओनकर सर्वोच्च काँटन क झाड़ी जइसा होत ह। हिआँ तलक कि ओनकर सबन त जियादा धर्मी मनई भी काँटन क झाड़ी स जियादा टेंढ होत ह।

### सजा क दिन आवत बा

उ दिना जेका तू अपेच्छा किहे रहा जउन तोहार सजा बरे होइ, आवत ही। अब तू पचन उलझ जाब्या।

5तू पचे आपन पड़ोसी क भरोसा जिन करा। तू पचे मित्र क भरोसा जिन करा आपन पत्नी तलक स खुलिके बात जिन करा।

6आपन ही घरे क लोग एक दूसरे क संग दुस्मन जइसा बेउहार करिहीं। पूत आपन बाप क आदर नाहीं करी। बिटिया आपन मताहरी क खिलाफ होइ जाइ। पतोहू आपन सास क खिलाफ होइ जाइ।

### यहोवा बचइया अहइ

7मई मदद बरे यहोवा क निहारब। मई परमेस्सर क इंतजार करब कि उ मोका बचाइ लेइ। मोर परमेस्सर मोर सुनी।

8मोर पतन भवा ह। मुला हे मोरे दुस्मन, मोर हँसी जिन उड़ावा। मई फुन स खड़ा होइ जाबउँ। यदपि आनु मई अँधियारा में बइठा हउँ यहोवा मोरे बरे प्रकास होइ।

### यहोवा छिमा करत ह

9यहोवा क खिलाफ मई पाप किहे रहेउँ। एँह बरे उ मोह पइ कोहान रहा। मुला अदालत में उ मोरे अभियोग क वकालत करी। उ, इ सबइ ही काम करी जउन मोरे बरे

उचित अहइ। फुन उ मोका बाहेर प्रकास में लइ आइ अउर मई ओकरे छुटकारा का लखब।

10फुन मोर बैरिन इ लखी अउर लजाइ जाइ। मोर बैरिन इ मोसे कहे रही, “तोहार परमेस्सर यहोवा कहाँ बा?” उ समइ, मई ओह पइ हँसब। लोग ओका अइसे कुचरि डइहीं जइसे गलियन में कीच कुचरि डइ जात हीं।

### यहूदी लउटइ क अहई

11उ समइ आइ, जब तोहरे देवारन क फुन निर्माण होइ। एक दिना तोहार देवार बहोत दूर तलक बढ़िही।

12तोहार लोग तोहरी धरती पइ लउटि अइहीं। उ सबइ लोग अस्सूर स अइहीं अउर उ सबइ लोग मिस्त्र क सहसन स अइहीं। तोहार लोग मिस्त्र स अउर परात नदी क दूसरी छोर स अइहीं। उ सबइ पच्छिम क समुदर स अउर पूरब क पहाड़ी स अइहीं।

13धरती ओन लोगन क कारण जउन एकर बसइयन रहेन बर्बाद भइ रही, ओन करमन क कारण जेनका उ पचे करत रहेन।

14आपन लोगन ऊपर आपन साही राजदण्ड स हुकूमत करा। आपन लोगन क रेवइ पई हुकूमत करा। लोगन क उ रेवइ जंगलन में अउर कर्मेल क पहाड़े पइ अकेल्ले रहत ह। उ रेवइ बासान में रहत ह अउर गिलाद में बसत ह जइसे उ पहिले रहा करत रहा।

### इस्त्राएल आपन दुस्मनन क हयाइ

15जब मई तू पचन्क मिस्त्र स निकारिके लइ आए रहेउँ, तउ मई बहोत स चमत्कार किहे रहेउँ। वइसेन ही अउर चमत्कार मई तू पचन्क देखौँउब।

16उ सबइ चमत्कारन क सबइ जाति लखिहीं अउर लजाइ जइहीं उ सबइ जातियन लखिहीं कि ओनकर “सक्ती” मोरे समन्वा कछू नाहीं अहइ। उ सबइ चकित रहि जइहीं अउर उ सबइ आपन मुँह पइ हाथ रखिहीं। उ पचे कान क ढँपि लेइहीं अउर कछू नाहीं अनकिहीं।

17उ पचे धूरि चाटत सौँपन क नाई अउर रेंगत भए जीव क नाई धरती पइ रहई। उ पचे अइसे किरवन नाई रेंगत रहई आपन बिलन स निकरत ही। उ पचे डेरत-काँपत भए हमरे परमेस्सर यहोवा क लगे जइहीं। परमेस्सर, उ पचे तोहरे समन्वा डेरइहीं।

### यहोवा क स्तुति

18तोहरी नाई कउनो परमेस्सर नाहीं अहइ। तू पापी लोगनक छिमा कइ देत अहा। तू आपन बचे भए लोगन क पापन क छिमा करत अहा। यहोवा सदा कोहान नाहीं रही, काहेकि ओका तउ दयालु ही रहब भावत ह।

19ओका हम पचन पई फुन दया करि द्या। ओका हमरे पापन स छुटकारा पावइ द्या। उ हमरे पापन क दूर गहिर सागरे में लोकाइ देब्या।

20याकूब बरे तू फुरइ रहब्या। इब्राहीम बरे तू दयालु रहब्या। तू अइसी ही प्रतिग्या बहोत पहिले हमरे पुरखन क संग किहे रहया।

# License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

## These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at [distribution@wbtc.com](mailto:distribution@wbtc.com).

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: [info@wbtc.com](mailto:info@wbtc.com)

**WBTC's web site** – World Bible Translation Center's web site: <http://www.wbtc.org>

**Order online** – To order a copy of our texts online, go to: <http://www.wbtc.org>

**Current license agreement** – This license is subject to change without notice. The current license can be found at: <http://www.wbtc.org/downloads/biblelicense.htm>

**Trouble viewing this file** – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

**Viewing Chinese or Korean PDFs** – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>